

NAZ.

Vol. III

[*

HARIRIUS LATINUS,

S I V E

**ABU MOHAMMEDIS ALCASEMI, FIL.
ALII, FIL. MOHAMMEDIS, FIL. OTMANI,
HARIRII BAZRENSIS, HARAMENSIS,
NARRATIONES CONSESSUUM NOMINE
CELEBRATAE,**

OMNES ET INTEGRAE,

**EX ARABUM SERMONE IN LATINUM TRANSLATAE, DIFFICILLIMIS
LOCIS ILLUSTRATAE, ET EDITAE**

S T U D I O

CAROLI RUDOLPHI SAMUELIS PEIPERI,

ÆDIS GRATIOSÆ AD SANCTAM CRUCEM ANTE CERVIMONTIUM DIACONI.

CERVIMONTII,

TYPIS CAROLI GUILELMI IMMANUELIS KRAHNII.

MDCCCXXXII.

HARIRII BAZRENSIS

NARRATIONES, CONSESSUUM NOMINE CELEBRATAE,

SEX PRIORES,

UNA CUM EJUSDEM PRÆFATIONE.

EX ARABICO SERMONE IN LATINUM VERTIT, NOTULIS

SUBJUNCTIS EXPLICUIT, EDIDITQUE

CAROLUS RUDOLPHUS SAMUEL PEIPER,

DIACONUS ECCLESIE EVANGELICÆ CERVIMONTANÆ.



CERVIMONTII,

TYPIS CAROLI GUILIELMI IMMANUELIS WRAHNII.

MDCCCXXXII.

VA1 1511226

VIRO EXCELLENTISSIMO, MAGNIFICENTISSIMO,

LIBERO BARONI

STEIN AB ALTENSTEIN,

**SERENISSIMI ET POTENTISSIMI BORUSSORUM REGIS IN REBUS RELIGIONIS ET OMNIS GENERIS
LITTERARUM IN BORUSSIE REGNO CULTUM SPECTANTIBUS SUMMO MINISTRO,
ETC. ETC.**

MUSARUM ORIENTALIU GLORIOSO PRÆSIDIO,

HAB

ARABICAE ELOQUENTIAE PRINCIPIS PRIMITIAS,

TANQUAM DEBITUM TANTIS MERITIS OFFERIMENTUM,

QUAMVIS EXIGUUM,

DEVOTISSIMA MENTE

DICAT

E D I T O R.

I n d e x.

Hariri consensuum versio haec latina, quo facilis promptiusque cum, quem intendimus, ferat fructum, tum quid argumenti singuli contineant, tum quo in libris arabicis loco inveniantur, ante omnia necessarium fuerit indicasse. Sive enim ponantur lectores, librum hunc in manum sumturi ea innotum de causa, ut o versione, non tam ad plausum Arabi aut linguae germanicae conciliandum, quam ad explendum dictorum Nostri sensum facta, propria sermonum ejus egregiorum cognitionis gaudium hauriant, nihil rationi convenientius videbitur, quam eos quocumque esse, quid hic parrigatur, quidque sibi legendum eligant; sive statuatur alii, qui labore isto, nisi viae duce, attamen amico comite per regiones, non adeo frequenter, ac Sudetorum valles et Him-alaja noster, visitatas, uti voluerint, molestum eis futurum apparebit, diutius investigare, consensum *Hariri*, quem in sermone arabico legere constituerent, ubi in versionis libro latine redditus extet. Itaque, praesertim cum hoc volumine, primum edito, consensuum ordo, qui in editionibus arabicis obtinet, plane non servatus sit, sed hinc illinc collegerimus, quod placuisset, epigrapho vero nihil indicet praeter nomen, rarius ab argumento, saepius ab urbe vel regiois inditum, ubi factum, quod narratur, contigerit; in quo, haud dubie morem inscriptionum *Corani Saratarum* imitati sunt hujusmodi orationum conditores; quid in sequentibus paginis invenias, accuratius describendi officium suscipiemus.

Cancerinus, scilicet consensus, in libris arabicis XVII, ita dictus est, quod ducentis verbis seriem proverbiorum continet, ordine recto itidemque verso legendam.

Sangarensis, XVIII, pag. 5, comparationem vasii vitrei et delatoris necesse enim narratione de vitioso malo.

Cargensis, XXV, p. 10, monstrat Abu Seidum nudum, vestes mendicantem, enumerantemque septem necessitates hiemalis.

Nomadicus, arabice *Badavija*, XXVII, p. 13, describit vitam moresque Beduinorum, sive Nomadum, dum narratur, uti Hareto, quaerenti amissam camelam, Abu Seidus furatus est equum.

Saïdensis vel Zaïdensis, XXXVII, p. 16, Abu Seidum ostendit accusantem filium suum inobedientiae, sive quomodo concilianda sint praecepta honoris cum paupertatis protervia.

Tafisensis, XXXIII, p. 20, pingit Abu Seidum distortum ore, mutataque in deterius fortunae adversitates.

Sabidensis, XXXIV, p. 23, exponens, ut Abu Seidus Hareto ingenuum pro serro vendidit, alludensque ad Iosephi Iacobitae historiam, commentatur sententias, omne nimis vile esse carum, frustra que moneri cupiditate coccos.

Schirasensis, XXXV, p. 28, est allegorica. Abu Seidus loquitur de filia virginis elocanda, intendens vinum, et de occisis, intendens vini utres.

Malaticensis, XXXVI, pag. 31, specimina logogriphorum, sive anigmatum verbalium, exhibet, quibus proponuntur dua verba permutanda cum aliis duobus respondentibus, quae conjuncta unum efficiant vocabulum significans.

Taniticus, XLI, pag. 36, tradit orationem de emendanda vita, nec non invitationem ad bibendam vinam, ab Abu Seido profectas, qui concionatorie partes sustinuerit misericordiamque inculcaverit, dum ipseus filius ageret mendicium.

His notis consensus, qui annexo volumine extant, sufficienter putamus designatos. Candidam autem et aequum lectorem Deo O. M. commendamus, *Domium Orientis et Occidentis* etiam atque etiam rogantes, ut eum votorum omniaum salubrium faciat competentem, ab omni male servet integrum! —

De Haririo et opere ejus Prodrömus.

Mos erat Arabibus, qui hodieum inter eos obtinet, ut, temporis jucundo modo fallendi causa, publica quadam donio convenirent, commodoque considerent, dum multorum illorum, qui apud eos narratorum artem exercebant, aliquis, historiölam, fabulamve, ad eorum gustum compositam, exsequeretur. Ejusmodi narrationes, persimiles iis, quae ab Italis dicuntur novellae, arabice appellantur *Hacajat*, vel *Makamat*, i. e. consessus, per eundem tropum, quo Romanorum disertissimus, concionem habere, quid? concionem legere, dicebat, pro habere, legere, orationem, nomine loci ad rem, quae ibi esset, fieretve, tralato, uti Arabes adeo coelum dicunt pro pluvia. Quorum quidem consessuum cum Achmed, fil. Hoseini, Hamadanensis, genus invenisset egregium, ita comparatum, ut singulae enunciationes rhythmis finalibus sibi responderent¹⁾; versus secundum prosodias et metricas regulas compositi orationem distinguerent; e grammatica, poesi, religione, traditione, historia, antiquitate, flores insererentur selectissimi; difficillima ostenderentur orationis artificia, maximaque linguae in aprico poneretur volubilitas et copia; hunc Haririus imitatus est. Unde, ut tota operis natura, ita hoc patet, auctorem nostrum non enarrare voluisse, quae re vera evenerint, quamquam multa vera intexuerit, aedificiumque facto historico superstruxerit, et personas quoque ab eo esse excogitatas, suffragante huic sententiae significat: Haret enim, proprie Harits, N. T. Aretas, notat quaestui studentem, Hammam curantem, Abu Said, vel Seid patrem *١١٢*, quod Arabes nomen Seid ad quemlibet virum designandum saepius usurpant²⁾. Bin Hammam non Hammamides, sed Hammamita vertimus, quod omnes homines filii sunt Hammami. De vita Haririi et cur hunc laborem inceperit, haec sunt satis certa. Tantum non omnes nomen ejus scribunt: Abu Mohammed Alcasem, fil. Alii, fil. Muhammedis, fil. Otmani, Haririus, Bazrensis, Hamamensis. Iacutus Hamataeus eum nominat *Ibno'lhari*³⁾. Natus fertur a. Heg. 446, Christi 1054, nemine contradicente. Ipso auctore descendit a gente *Rabiatol'fars*. Ingenium et doctrinam ejus monstrant praeter

¹⁾ Hamadanensis specimen affertur calci sex consessorum priorum. ²⁾ Vide Giggeum. ³⁾ Vide Galium ad *Expenii Gramm. Arabicam*.

hoc opus, ejusdem Gramatica versibus scripta, Molhat alirab, liber Alrhowaz, tractatusque et versus quamplurimi in consensibus non obvi. Ad Schafaitas eum pertinuisse quoad religionis ritus, concluditur e cons. XXXII; in poesi paronomasias vehementer amasse, docent praeter ipsius effatum cons. XXIII, quamplurima in consensibus exempla. Quod narrat de facie ejus tetrica, nihil continet incredibile; animam semper pulchram in corpore pulchro vivere, experientia refutatur quotidiana. De primo ad has narrationes pangendas impulsu ipse memorat, uti, cum aliquando contradixisset viris, quibuscum conversaretur, doctis, interitum eruditionis lugentibus, nec simile Hamadanensis consensibus qui pangeret restare contententibus, a viro quodam potentissimo excitatus fuerit ad laborem hunc aggrediendum. Alia de eo narrata contrariis relationibus in dubium vocantur. Annus ejus fatalis nunc perhibetur a. Heg. 515, Christi 1124, nunc Heg. 516. Itidem sunt, qui dicant, mortuus est Bazrae in rico Haramitarum; dum non desunt, qui contendant, decessit Maschani, oppidulo prope Bazram. Alii tribuunt ei duos filios, Nagma'ddin Abdollah et Dhio'ddin Obeido'llah; alii filium ei dant Abulkasem Abdollah dictum. Ne hoc quidem certum, quis ille fuerit, cujus nutu hoc opus aggressus sit. Secundum relationem, quae ipsius filii Abulkasemi Abdollae auctoritate niti dicitur, suator ei fuit Scharfo'ddin Abu Nazr Anuschirvan, Vasiri munere fungens apud Imamum Mustarschid billah, vir potentissimus et doctissimus, mort. Heg. 532; sed adjicit Chalican: sic inveni quidem multis in chronicis; cum vero a. 686 Kahirae essem, exemplar Haririi consensuum ab ipso scriptum repperi, cujus tergo propria manu inscripserat, se pepigisse hoc opus Galalo'ddino Amido'ddaulae, qui itidem apud Mustarschidum Vasiri munere functus est, mort. a. 522. Alia tandem, quae de eoarrantur, non absimilia sunt fictis. Vix dives haberi potest ille, qui dicit: mala fortuna coactus haec mercimonia, quibus publicae reprehensioni me expono, venum dedi; octodecim palmarum millia Maschani genti potius, quam ipsi Haririo fuisse existimes. Nec potuit illi, quem in consensibus pingit eloquentissimum et vaferrimum, nomen Abu Seidi indere a Muth-haro, filio Salari, discipulo suo; huic potius Abu Seidi nomen datum fuerit, ut eloquentiam ejus laudarent. Quod Haririus, absolutis quadraginta narrationibus Barhdadam profectus, ibidemque a doctis plagii accusatus, in Divano nequiverit versus quosdam componere, quos Vasirus ei, ut artem demonstraret, pangere praecepisset, refutatur tum iisdem traditionibus, quae eum celebrem Grammaticum fuisse, discipulosque instituisse docent, tum conspicuo in Haririi consensibus acumine. Quod Abu Seidus quidam Sarugensis, qui, modo consensu XLVIII narrato, mala sibi a Graecis illata in templo circi Haramitarum questus fuerit, deinde vero aliis locis aliter homines ad misericordiam commoverit, ansam dederit consensibus Haririi pangendis, non convenit cum illis, quae Haririus ipse narrat de conventu eruditorum, in quo tales narrationes scribere jussus fuerit. Etsi non negari potest, ejusmodi historiam temporis rationibus convenire; Sarugum, Mesopotamiae oppidum invasionibus

Græcorum fuisse expositum; mentionem infortunii repente illati filium esse, quod per omnes fere consensus pertingat; nec absurdum est credere, Haririum, ad pangendos consensus excitatum, cum materiam quaereret, e vere auditis hausisse argumentum, quo, bellorum cruciatorum tempore, vix ullum esset aptius ad commovendos Muslemorum animos.

Gloriam, quam Haririus laboribus suis nactus est, testatur, præter Ibn Chalicani et Haggi Chalfiae scripta bibliographica magnus virorum doctorum numerus, qui consensus ejus scholiis explicaverunt. Sylvestrius de Sacyo usus est commentariis Alnotharresii Chowaresmii, Alocbarii Barhdadensis, Alcasii Scharischensis, qui est copiosissimus, Abu Becri Rasensis, in quibus allegantur scholia Abdo'llae Azzacalii et Tag'oddini Fangadhii. Insuper sex codices Mss. habuit, quorum in marginibus quamplurimae adpersae erant notae. In ebraicam linguam versi sunt a Judaeo Hispano, Jehuda, filio Solomonis, filio Alcharisii; cujus ex versione, tam bene excepta, ut mox imitatores *) sequerentur haud spernendi, Sylvestrius communicavit consensum quintum. Syris, quorum poetae, Eichhornii ⁵⁾ judicio, nihil habent, quo alliciant, oblectent, hilarent, invidia excitata erat ab Arabibus, Syriacam linguam, quasi minus copiosam, incultam et rudem, vituperantibus, suae vero linguae copiam et venustatem vindicare nitentibus, perpetuoque ad fidem faciendam producentibus librum, quem Makamat, rhythmos appellarent, ut Ebed Jeschu Sobensis, a. 1291 p. Chr., Patriarchae monitu, Syriacae elegantiae specimen ad fastum Arabum comprimendum edere constitueret. Golius dicit: Haririus eo vixit aeo, quod politioribus inter Arabas litteris plurimum floreret. Eamque in hisce ipse promeruit laudem, ut earundem in Asia et Africa studiosis in praesentem exinde diem commodior vix alius habeatur author, a quo proprietatem linguae, simulque copiam ac elegantiam addiscant. Pocokius ⁶⁾, qui commentatores nominat Schirassensem et Moshaffarium, itidem profitetur, Haririi Makamat librum esse elegantiarum arabicarum penu locupletissimum. A. Schultensius, qui scholiaste Teblebio multum usus est, Haririum eloquentiae Arabicae principem appellat, opus ejus, ut Minervam Phidiae, consecrari et in arce apud Arabes collocari meruisse judicat, seque in eo invenisse ait: eminentem et expressam imaginem praeae illius grandiloquentiae Orientalis, qua liber Jobi exaratus est, quaeque in Psalmis, in Proverbiis, in reliquo corpore Bibliorum, poetico praesertim, ac prophetico, tam magnifice, tamque insignite se exerit. Sylvestrius de Sacyo quamquam Nostri minime captus est difficilibus nugis, tamen non ultimam hanc laudem ei tribuit: *au milieu des difficultés, qu'offre son style, il attache le lecteur capable de l'entendre d'un charme irresistible.* E Germanis vero, ut alios taceam, Theologum pari profundioris doctrinae ac concionandi facultatis gloria florentem, clarissimum de Ammon ⁷⁾, in libro institutionum ad

*) Emmanuel fil. R. Schelomoh. Cfr. J. Buxtorfi Bibliotheca Rabbinica p. 88. ⁵⁾ Cfr. Praef. ad Jonesii Comment. Poes. Asiaticae. ⁶⁾ In Specimine Historiae Arabicae. ⁷⁾ Handbuch der Anleitung zur Kanzelberedsamkeit, Nürnberg 1826, p. 314.

orationes sacras, et *Haririi* nostri narrationes eis, qui hac in arte ad celsiorem eniti gradum velint, legendas esse praecipere meminimus. Nostra, si quid valet, sententia haec est. Multi libri arabici a pluribus, quam solent, legi merentur; *Arabsiades* e. g. ob ornatum; *Bahao'ddini Vita Saladini* ob venustam simplicitatem; *Abulfedae Annales* ob rerum fide narratarum copiam; *Mille noctes et una* ob varios phantasiae ludos; *Kasvini*, *Damir*, *Ibn Batuta*, ob miracula, quae produnt; *Hamasa* et *Moallacat* ob sententias et libros ebraicos illustrantia verba; *Haririi* autem lectione nemo carere poterit, qui de linguae arabicae copia, volubilitate, elegantia, genio, omninoque de dialectis Semiticis rectum iudicium facere voluerit. Quamobrem satis meriti hac versione nobis comparasse videremur, si nullam aliam haberet utilitatem, quam ut *Haririi* opus, et *Schultensii*, *Sylvestrii* de *Sacyo*, *Rueckerti*, aliorumque^{*)} in eo edendo, explicando, vertendo, labores unius aut alterius revocarent in memoriam.

^{*)} Joh. Jac. Reiskii quidem consensus XXVI editionis exemplaria rarissima esse videntur; cfr. A. Th. Hartmann: *Über die Ideale weiblicher Schöheit bei den Morgenländern*. Düsseldorf 1798, p. 175.

I n d e x.

Prouti ab initio constitueramus et nuperrime promiseramus, priores hic Haririi consensus latine veros emittimus. A. Schultensii enim versio eorum latina non solum in paucorum tantum bibliothecis reperitur, sed etiam haud ubique eum sensum exprimit, qui nobis, ampliore scholarum copia instructis, poetæ dictis subesse videtur; textum sequitur non satis emendatum; ob annexum commentarium vasti corporis est opus; non satis congruit cum illis rationibus, quæ nos in reliquis vertendis secuti sumus; nec amplectitur ab auctore ipso præmissum præfatum, non minus sane, quam narrationes sequentes, elegans et politum, ac pernecessarium ad Nostri consilium et merita recte judicanda. Nec minus nos adduxit quod, qui singula expresserit membra, caput non omittere debere, Arabique nostri amantibus jucundum fore existimavimus, opus ejus totum translatum habere, etiamse nostro tantum qualicumque labore. Singulorum, quo hic fasciculus complectitur, stromatum, nomina, in libris arabicis numeros, in hocce ubi incipiant, paginas, nec non argumenta, his paucis accipe!

Prima occurrit præfatio, nullo, nec in textu arabico, nec hac in versione, numero notata. Enarrandis operis occasione, difficultatibus, sine, benevolentiam captat, postquam summi numinis auxilium imploravit, more in omnibus, etiam ultimæ notæ, Arabum scriptis observato.

Sequitur consensus Zananiensis, sive Sazanensis, I, p. 5, quo Haret Hammamides, vel Hammamita, narrat, quemadmodum in illa Arabiæ felicis urbe Abu Seidam, oratorem ad pietatem compellentem, sed non satis abstemium, cognoverit.

Holvaniensi II, p. 8, Haret narrat, se cum eodem Abu Seido, Holvani versante, intimam amicitiam coluisse, postea vero, cum fati separassent, eum improvise in urbe patria reperisse, in concilio doctorum pulchritudinis humanæ comparationes proponentem, venustiores a laudatissimo Bochtario propinatis.

Kailano, arabice etiam Dinarija dicto, III, p. 12, mendicus claudus, a gente Kaila se oriundum dicens, Hareto cum dilectissimis viris conversanti supervenit, jussusque aureum laudare, tam vituperare, utroque optime fungitur. Quo facto Haret agnoscit Abu Seidum et simulatam claudicitatem excusare compellit.

Damiatensi, II, p. 15, Haret, proficiens Damiatam, in statione aliqua nocturno tempore audit duos viros disputantes de recto erga inimicos se gerendi ratione. Hoc sermone allectus dum nocturnos confabulatores quaerit, videt Abu Seidum et filium ejus, qui maximis exinde ab ipso et sociis ejus beneficiis cumulati, corporis in pago vicino lavandi prætextu aufugiant.

*

Cufice, V, p. 19, Abu Seïdus Haretam, Cufae, nocte quadam cum amicis confabulantem, in admirationem rapit et expilat historiold, de inopinato cum filio suo Seïdo concurren, quem, se in scio, Barra, mulier Mavânae ducta, sed a se relicta, pepererit. Quamvis deinde, cum Hareto solus, se filium habere negare vult. Sed in multis concessibus filius ei tribuitur, etiam in antecedente. Unde Cuficum, in quo nondum satis certe apparet, utrum Abu Seïdo filius sit, nec ne, ante Damiatensem ponendum esse injicitur cogitatio, quippe quo id supra omnem dubitationis aleam elatum est.

Mararhiensis, sive Maragiensis, VI, p. 23, arabice etiam Cheifa dictus, quod nomen, tales indicans, quorum oculus alter caecius, alter niger est, ob argumentum indiderunt, monstrat Abu Seïdum, uti in scribarum Mararhensium concilio difficile solvit problema; orationem nempe scribit, qua primi cujuscunque verbi litterae omnes sunt punctatae, alterius cujuscunque omnes hoc ornatu carent. Oblatum ei, cognita arte, munus non accipit, quod pauper esse malit et liber, quam munere occupari non semper grato, nec satis perspecto.

His autem prioribus concessibus eadem, ac reliquis, forma impressis, opus nostrum absolvimus, omniaque jam hujus versionis partes ita ligandae sunt, ut unum efficiant volumen, quo hic fasciculus primum, Decies alterum, Pars Maxima, cui Emendandorum tabula affigatur, tertium locum occupet. Vos, qui hoc labore utimini, per omnes tempora mutationis expertem nobis servate favorem, beati dicti semper, quod nunquam mutatur, numini!

Nomine Dei Summe Misericordis!

Dixit Doctor gloriosissimus, singularis, Abu Muhammed Alcasem, fil. Alî, filii Otmani, Harirîus Bazrensis, cujus Deus refrigeret sepulcrum¹⁾!

O Deus! celebramus te ob eloquentiam, quam nos docuisti, et disserendi facultatem, quam nobis indidisti, perinde ac laudamus propter dona, quae in nos effudisti, et operimentum, quod super nos expandisti; vocamus te averruncum a nimia linguae alacritate, modumque excedente garrulitate, pariter ac oramus, defensor sis a barbariae noxa et haesitationis ignominia; rogamus, ut a nobis arceas tentationem immerita laude ornantis, sicuti prohibeas flagitamus, ne scopus fiamus contentui vituperantis et opprobrio diffamantis; supplicamur, condones, quod cupiditates nos pepulerunt in fora dubiorum, uti condones precamur, quod gradus tulimus in vicos peccatorum; atque petimus a te concurrentem gratiam, dirigentem in rectam viam, cor conversans cum veritate, linguam ornatam veracitate, sermonem fultum demonstratione, assecutionem recti avertentem a declinatione, vincentia animae cupiditatem proposita, intellectum perspicientem rerum pretia, et ut directione tua nos ducas ad cognitionem, ope tua adjuves ad dilucidationem; ab errore nos arceas narrantes, a stultitia avertas jocantes, ut securi simus linguae peccatorum falcium instar demetentium, et infortuniorum mendaciis nascentium,

¹⁾ Proprie, cubitum.

nec accedamus adaquationi illicitae, aut loco stemus poenitentiae, aut experiamur nocivas sequelas increpationemque acerbam, aut cogamur ad excusandam imprudentiam. O Deus, imple nostrum votum, largire petitum, nec ab umbra tua profusa nos secludas, aut manducaturum proponas epulas! Nam ad te tendimus precum palmam, tibi confitemur devotionem nostram et miseriam; deprecantes, ut coelitus manifestes nobis largam tuam liberalitatem, omnes complectentem benignitatem, devota prece, spei merce, tum aditum ad gratiam tuam patefacientem Mohammede, mortalium principe, intercessore exaudito die resurrectionis, quem posuisti sigillum prophetis, constituisti in supremis coelis loco excelso, et descripsisti in libro tuo claro, dicens, et dicentium quidem es veracissimus³⁾: non ego te mitto, nisi creatorum misertus. O Deus, propitius sis ei et genti ejus recta via praeiuncti, sociisque confirmatoribus religionis aedificii, faciasque nos horum et illius rectum cursum imitari, nec non horum omnium et illius amore adjuvari; nam tu es omnipotens, tibi precibus annuere est conveniens⁴⁾!

Posthaec scias! In conventu aliquo amicorum eruditionis, cujus hoc tempore quiescit aura et extinctae sunt lampades, mentio injecta est consessuum, quos protulit temporis miraculum, doctissimus Hamadanensis, quorumque ad Abu'l-fatachum Alexandrinum retulit compositionem, ad Isam, filium Haschami, narrationem, viros ignoratos, nemini cognitos⁵⁾. Ibi quidam, cujus nutus est imperium, et cui obedire praeda, innuit, ut pangerem consessus, sequens vestigia mirandi inventoris, etiamsi non attingeret claudicans robusti praevertentem cursum. Objeci quidem, quod dicitur de eo, qui duo componit verba, aut conserit unum duosve versus⁶⁾, et subducere me tentavi stationi, qua stupet intellectus, deficit cogitatio, examinatur ingenii profunditas, cognoscitur viri pretium, et qua qui versatur coactus est, lignum cadere noctu, trahere pedites et equites⁷⁾, vixque

³⁾ In edit. Syl. d. Sac. legitur: verbum est apostoli nobilis, firmam habentis potestatem apud throni dominum, audit, fidelis. Sic Haririus primo scripserat, teste Ibn Gahuro, a quo Hariri concessus accepit Abu'labbas Scharlachlensis. Quoniam vero phrasia illa Cornal ad angelum Gabrielem plurimorum sententia pertinet, postmodum Haririus usitatorem ei substituit. ⁴⁾ Quamquam Romani clausulas consonantes fugiant, in his tamen precibus vertendis rhythmos finales adhibuimus, ut pro specimine sint styli, quo totum opus est compositum. ⁵⁾ Personae sunt fictitiae, ut Haretus et Abu Saidu. ⁶⁾ Alluditur ad proverbium: qui librum aut versus componit, intellectum suum praestitit hominibus; si rectum viderit, in sublimi collocatur, si erraverit, lapidibus petitur. Aliud proverbium dicit: vir gaudet vita jucunda, quamdiu non dicit curmen, aut componit librum. ⁷⁾ I. e. convertere promiscue.

salvus evadere potest e multiloquio, aut obtinere caespitationis remissionem. Cum autem nollet mercatum rescindere, nec a postulato abstinere, acceptam habui vocationem ejus, ut obsequens, operam navavi imperio ejus exsequendo, ut perficiendo par, et composui, quamvis multas molestias perpetiens a vena congelata, intellectu extincto, doctrina subsidente, curis affligentibus, quinquaginta consessus, complectentes sermonem serium et festivum, phrases lenes et solidas, eloquentiae candores et margaritas, eruditionis pulchra et rara, praeter, quibus eos ceu baltheis cinxi, versus et venustas allegorias, quibusque eos ceu gemmis distinxi, proverbialia arabica, subtilitates doctas, aenigmata grammatica, judicia dialectorum varietate ambigua, epistolas virgines ⁷⁾, orationes comtas, admonitiones flebiles, ridicula exhilarantia; quae quidem omnia eloquenda commisi linguae Abu Seidi Sarugensis, narrationem fulciens auctoritate Hareti, filii Hammami, Bazrensis. Immiscendis vero ludicris non aliud intendi, quam ut excitarem legentes, quamplurimosque facerem petentes. Alienorum versuum duos tantum eis intexui singulos, quibus superstruxi consessum Holvaniensem, et duos alios geminos, quibus obsignavi consessum Cargensem; reliquorum omnium ingenium meum est pater virginitatis ⁸⁾, protulitque dulce ac amarum. Haec de me dicere habeo, agnoscens, inventorem egressum esse extremas metas, dominum esse miraculorum, et quemcumque post eum ad pangendos consessus se convertentem, etiamsi Kudamae ⁹⁾ eloquentia praeditus fuerit, ex illius tantum hausturum esse redundantia, illiusque ductu profecturum hac viâ; divinum sane est dictum:

Si praevertissem illius gemitum, plorans amore Sudaë, satisfacissem animo, nec poeniterem;

Sed illa me praevertit gemendo, illius meas excitavit gemitus lacrimas; praestantia ergo est praevenienti ¹⁰⁾.

Spero autem, me, dum ad hanc garrulitatem (quasi ad adaquationis fontem) adducam, huncque rivum intrem, non similem futurum illi, qui unguis sibi suis effodit mortem, aut manu sibi sua abscidit nasi mucronem, nec relatum

⁷⁾ I. e. primum exorbitatus. ⁸⁾ I. e. qui defloravit virginitatem. ⁹⁾ Scriba Harhadadensis, multorum librorum auctor; primus, qui de arte rationalia scripsisse fertur; nevo Muktaderi Billah.

iri in operatorum frustratorum numerum, quorum erroneum erat per vitam mundanam studium, quamquam optime se agere existimarent. Verum quidem est, etiamsi indulserit prudens, errata se non advertere simulans, et defenderit amicus connivens, vix potero effugere, ne rudis ignorans, aut inimicus ignorantis speciem assumens, me deprimat ob hunc librum, et dicat, eum pertinere ad prohibita. At qui res spectare oculo intellectus solitus fuerit, cujusque in fundamentorum structuras alte penetraverit visus, ille hos consessus filo inseret institutionum, ordineque constituet tractatum, ἀλόγων et ἀφανήτων continentium sermones ¹⁰⁾, cujusmodi historiarum, non reperitur, qui aurem neget sonis, aut unquam criminatus fuerit relatores. Tum, si opera aestimari debent ex intentionibus, quibus vincula quoque nectuntur religiosa, quid criminis erit illi, qui fabulam composuerit ad commonefaciendum, non ad seducendum, proposuerit sibi eis corrigere, non spargere mendacia? Nonne is ejus loco habendus est, qui obedit petenti doctrinam, aut dirigit in viam rectam?

Praeterquam quod contentus ero, animo servisse ¹¹⁾, et liberum ab eo evasisse ¹²⁾, neque vituperatum, neque laudatum.

Deum imploro adiutorem eo, quo intendo, defensorem ab eo, quod dishonestet, directorem ad id, quod recta via ducat. Non enim est refugium, nisi ad eum, nullum auxilium, nisi ab eo, nulla fortuna, nisi per eum, nullum fulcrum, nisi ipse; ei me committo, ad eum respiciens me converto!

¹⁰⁾ Ferunt virum, cum audivisset columbam gementem, dixisse apud se, haec certe columba gemit ob discessum conjugis, ejusque exemplo motum litidem suam flevisse amatam; tum vero semetipsum ita esse allocutum: quid juvat fletus, quum didici a columba? Columbae erit palma, etiamsi plorando attigerim extremum! ¹¹⁾ I. e. fabularum. ¹²⁾ Proprie, tulisse. ¹³⁾ I. e. ob opere, ad quod ille adigebat.

Z a n a n e n s i s .

Narravit Haret Hammamita. Cum conscendissem peregrinationis gibbum ¹⁾, egestate removente a sociis, fortunae casus me propulerunt Zanāam Iamanae; eamque intravi vacuis oculis, conspicua inopia, ne vitae quidem sustentandae necessarium possidens, nec in pera buccellam inveniens. Atque incepti vias ejus secare instar errabundi, vagari in circis ejus instar sitibundi, quaerens per pascua meorum prospectuum, et spatia matutinorum excursuum, vespertinorum recursuum, liberalem, cui tererem meum sericum ²⁾, et exponerem necessitatem, aut eruditum, cujus adspectus mihi fugaret tristitiam, relatio expleret sitim; donec obeundi finis perduxit, bonae fortunae initium ³⁾ direxit, ad consessum amplum, completentem compressionem et lamentationem. Penetravi autem coetus silvam, ut explorarem lacrimarum causam; et conspexi in circuli medio hominem, tenui corpore, apparatu itineris religiosi, voce flebili, rhythmos componentem gemmis phrasium, aures pulsanter minis admonitionum, circumdatum miscellis catervis, ut luna halone dactylive involucris. Hunc, cum accessissem, ut e praeceptis ejus ignem peterem, et unionum ejus aliquos colligerem, dum totum procedebat hippodromo suo ⁴⁾, rudebantque extemporaneae facundiae gurguliones ⁵⁾, audiavi dicere: O errans, ut attonitus, in juvenili alacritate, laxans superbae imaginationis vestem, praeceps ruens in ignorantia, propensus ad ineptias! quousque perseverabis in errore, gratum habens iniquitatis pastum; quem ad finem

¹⁾ I. e. camelum. ²⁾ Coram quo deponerem pudorem. Sericum hic notat frontem, vel genam. ³⁾ Alii vertunt: viam patefaciens blanda interrogatio. ⁴⁾ Dum moderate prosequeretur orationis filum. ⁵⁾ Vel uvar, partes oris faucibus impendentes, quas libidine percitus camelus prodit. Plinius ergo errat, homini tantum ejusmodi uvas esse, in H. N. contendens.

perges in animi levitate, deditus ludo? Repugnantia tua provocas tenentem antias tuas ⁶⁾; turpitudine incessus audax es contra scientem arcana tua. Abscondis te quidem proximo, sed coram oculo es observatori tuo; latere studes servum tuum, sed nihil abditum latet dominum tuum. An cogitas, statum tibi tuum auxilio futurum esse, instante discessu; aut opes te tuas servaturas, trudentibus in exitium operibus; aut poenitentiam satisfacturam, lapso pede ⁷⁾; aut gentem tibi tuam veniam impetraturam ⁸⁾, die, quo te comprehenderit congregationis ⁹⁾ locus? Non ibis via, quae recta ducit, festinabis curare morbum, retundes aciem transgressionis, animamque domabis ¹⁰⁾, quae maximus tuus est inimicus? Nonne mors praestitutus tibi est terminus? qui ergo te praeparas? Nonne canities te monet? et qui te excusas? Nonne in sepulcro tuus est somnus? et quid respondes? Nonne ad Deum est iter tuum? et quis auxiliator? Diu est, quod tempus te expergefecit, et connivisti; quod admonitio te traxit, et recessisti; clara tibi proposita sunt exempla, et coecitatem imitatus es; veritas tibi constitit, et rebellasti; mors te monuit, et oblitus es; data fuit juvandi potestas, et non juvisti. Praefers obolum, quem recondas, monito, quod serves; praeoptas arceam efferre, quam beneficium conferre; a ducis expetenda directione avertis te ad petendum commeatum; magis inhaeret cor tuum hyacinthis donorum, quam statis temporibus precum; litationes nuptialium dotum praestant apud te dispendendarum eleemosynarum officio; variorum ciborum patinae jucundiores tibi sunt, quam rerum divinarum paginae; majori tibi delectationi est jocus aequalium, quam lectio Corani capitum; jubes aequitatem, et violas ejus septum; interdicens iniquitate, nec ipse ab ea te continet; retrahis alios ab injuriis, ipse cum eis rem habes; timesque homines, cum dignissimus sit, qui timeatur, Deus. Tum recitavit:

Infelix ille, qui petit mundum, effusum eo flectens cursum!

Nunquam emergit ¹¹⁾ ex amore ejus et modum excedente desiderio;

At, si cognitum haberet, sufficeret ei illius, quod desiderat, residuum ¹²⁾.

⁶⁾ Frontis comm. Imago est ab equis petita. ⁷⁾ I. e. te mortuo. Cfr. Haririi P. M. p. 159 l. 11. ⁸⁾ Vel, Deum flexuram. ⁹⁾ In resurrectione. ¹⁰⁾ Proprie, in manu percussio. ¹¹⁾ Vel, ad se redit. ¹²⁾ I. e. paucillum.

His dictis coegit pulverem suum ¹³⁾, siccavit succum ¹⁴⁾, brachio prehendit utrem, axillae subdidit fustem. Cum autem coetus animadverteret, eum se movere ad abitum et praeparare ad deserendum centrum, quisque manum inseruit sinui replevitque ei fluxu suo situlam, dicens: hoc impende sumitibus tuis, aut divide sociis! Ille accepit palpebras comprimens ¹⁵⁾, abiit gratias agens; comitaturis valedixit, ut tegetet viam suam; secuturosque dimisit, ut sua ignoraretur sedes. Dixit Haret Hammamita. Equidem vestigia ejus legi, qua me videre non posset, donec pervenerat ad cavernam. In hanc illapso incaute moram concessi, donec detraxisset calceos, lavasset pedes; tunc eum oppressi. Et inveniens eum sedentem, e regione discipuli, ad panem similagineum, assatumque hoedum, et coram eis seriam vini, increpavi: heus tu! illane tu dixisti, et haec tui est probatio? Ille contra, suspirans ut flamma, prope aberat, ut rumperetur irâ, nec desinebat torvis me intueri oculis, ut, ne in me insultaret, metuerem. Cum autem sedatus esset ignis et evanisset ardor, declamavit versus:

Indui stolam ¹⁶⁾, ut venarer Chabizam ¹⁷⁾, et fixi hamum in omni pisce ¹⁸⁾.

Admonitiones meas feci rete, quo venatorem captare et praedam.

Fortuna me eo adegit, ut cum doli mei subtilitate penetrem leonis arboretum, Nec timeam ejus in me conversionem, nec tremeant mihi scapularum muscoli ¹⁹⁾.

Quamquam ad aquam ²⁰⁾, quae existimationem inquinat, anima nunquam ducit cupida.

Tempus vero, si aequè judicaret, non committeret arbitrium hominibus nequam.

Dein mihi dixit: accede et ede, aut, si mavis, surge et loquere! At ego, conversus ad discipulum, hunc compellavi: adjuro te per eum, quem imploras defensorem a noxa, indica mihi, quis iste! Regessit: Abu Seid Sarugensis, lampas peregrinatorum, corona eruditorum. Illic ego, unde veneram, revertens, solvi admirationem debitam ei, quod videram.

¹³⁾ Quem quasi orationis cursus roncitaverat. Alii derivant a Moelama ibn Abdo'Inalik, qui, cum quidam confusae coram eo locuti essent, hos vero excepisset, qui optime disceret, dixisse fertur: hujus viri oratio, post illorum, similissima est nubi glutinanti pulverem. ¹⁴⁾ Lacrimas. ¹⁵⁾ Pudorem simulans. ¹⁶⁾ Proprie, ventis nigra, quadrata, limbata. ¹⁷⁾ Cibum ex dactylis, aut amylo et defruto, cum butyro mista. (Cf. cons. XIX.) ¹⁸⁾ Notat quoque silium dactylorum genus et lapidea. ¹⁹⁾ Musculi inter hamerum et latus, qui in equis tremere solent. ²⁰⁾ Haec quoque imago ab equis cameliae petita est. Pro aqua proprie vertendum fuisset: adaquandi locus.

H o l v a n i c n s i s .

Narravit Haret Hammamita haecce. Ex quo amuleta mihi demta et cidares appensae sunt, deditus eram visitandis locis eruditionis, et emaciandis inservientibus ad ea petenda camelis, de illâ ut obtinerem, quod mihi ornamentum esset inter mortales et nubes in siti. Et ob excedentem quidem aviditatem lucrandi ejus ignem, cupiditatem induendi ejus vestem, disputabam cum omni praecipuo et tenui, potum flagitabam ab imbre et a rore, lactabar etiam (talibus, quorum doctrina erat) esse potest, fortasse. Cum autem descendissem Holvanum ¹⁾, fratres jam expertus, explorata habens pretia, nonnescius, quid probro sit, quid laudi, inveni Abu Seidum, Sarugensem, versantem se in formulis genealogiarum, obscuritate utentem ad faciendum quaestum, nunc praetendentem, se pertinere ad Sasanitas ²⁾, nunc genus referentem ad reges Rhassanitas ³⁾, nunc prodeuntem caractere poetarum, nunc vestitum superbia magnatum, praeterquam quod, utut vario se ostendebat habitu, et apparebat mendacium, ornatus erat nitente vultu et doctrina, blandimentis et prudentia, copiosa eloquentia, ex tempore dicendi facultate obediente, moribus praestantibus, pede scientiarum verticem premente. Ob pulchritudinem itaque instrumentorum, quamquam vitiosus, tolerabatur ⁴⁾; ob doctrinae copiam adspectus ejus amabatur; ob decipientem comitatem a declinatione ejus abhorrebat; ob sermonis dulcorem obtinebat, quod quaerebat.

¹⁾ Qui locus ideo a poeta hic nominatus esse videtur, quod pervagata erat historia de Holvaniensium palmarum pari, quod, amicitiae perennia diu exemplum, tandem nihilominus separatim est. Cfr. meam dissertationem de Moullaka Lebidi p. 23. ²⁾ Ne cogites hoc loco de quarta regum persicorum dynastia! Haririus in animo habet mendicos. Sâsân, dictus major, fil. Asfandiari, fil. Caschtasâfi, tradito a Bahmane patre regno filiae Hamai, vel Hamani, mulieri formosissimae et prudentissimae, iratus ad Cardos pastores abiit. Hinc omnis generis mendicorum, egenorum, sordorum, coecorum, canes et simias circumducentium, vocatur princeps, populi permagni, cujus varias artes ipsorum lingua carmine exposuit Abu Daif Chasragnâs.

³⁾ I. e. reges Syriae, ita dictos, quod e Lamana huc, ad fluvium Rhassan, se contulerant. ⁴⁾ Proprie, vestiebatur.

Quare inhaesi ejus fimbriis propter egregias elegantias, inhiavi amicitiae propter pretiosas proprietates:

Eoque dispellebam curas, tempus mihi conspiciebam serenum, lucidum.

Propinquitas ejus mihi erat affinitas, mansio copia, adspectus irrigatio, vultus vita.

Atque sic morati sumus temporis spatium longum, dum ille mihi quotidie parabat gaudium, de corde pellebat scrupulos, donec manus inopiae ei miscuit poculum separationis, carnis in osse defectus instigavit ad relinquendam Iracam, vitae commoditatum penuria projecit in mundi plagarum deserta, vibratum vexillum inediae eum inseruit itineris sociorum seriei, exacutaque ille acie propositi profectus est, cor regens ejus habenis ⁵).

Nec placuit mihi post illius discessum, quicumque adhaereret; non excitavit conjunctionis desiderium, quicumque cieret.

Non apparuit, postquam ille aufugerat, par eloquentiae apparatus, nec amicus, complectens eadem ac ipsius animus.

Et absconditus mihi erat aliquamdiu, ignorabam ejus lustrum, nec inveniebam, qui daret certam notitiam. Cum autem, reversus a peregrinatione in rami mei plantarium, praesens essem domo scribarum, ubi conveniebant literati, concurrebant indigenae et advenae, intravit spissa praeditus barba, habitu lacero, et salutatis sedentibus consedit in hominum ultimis. Dein incipiens manifestare, quod uter ejus coriaceus continebat ⁶), in admirationem rapiens praesentes eloquentia, proximo dixit: ecquid tu libri inspicis? Respondit: carminum collectionem Abu Obadae ⁷), cujus agnita est praestantia. Perrexit: num invenisti in eis, quae vidisti, novi quid, quod pulchrum existimes? Respondit: certe, dictum ejus:

Quasi ridens detegat margaritas ordine consertas, aut grandinem, aut parthenium ⁸).

⁵) Proprie, funibus ⁶) I. e. quod scribat. ⁷) Abu Obada, vel Ubada, falso Ihada et Ebada, appellatur Valid bin Abid Albochtari, mortuus an. Heg. 266, Chr. 879. ⁸) Vel, matricaria, chamomilla, anthemis; cfr. Ionesii Poes. As. Comm. p. 110.

Hoc enim versu plane singularem inclusit comparationem. Resumsit ille: o miraculum, o quam interit eruditio; pro pingui habuisti tumidum, et flando excitare voluisti ignem, cui deest materia; heu, quantum distas a versu eximio, dentium comparationes complectente hōcce! et declamavit:

Anima redimam dentes, per labia diducta suaviter nitentes, aqua ornatos, omnis
alius aquae desiderium eximente!

Produnt margaritas recentes, grandinem, parthenium, palmarum flores, bullas
innatantes vino.

Atque omnes, qui aderant, hunc versum reputabant bonum et dulcem, petebantque, ut eum repeteret et dictaret. Interrogatus deinde, quis eum pepigerit, et, vivatne compositor, an mortuus sit, respondit: per Deum! veritas dignissima est, cui obsequamur; audiri debet, quod res est: ille ipse (est compositor), qui hodie vobiscum confabulatur. Dixit; sed coetus videbatur dubitare de derivatione ista, nec fidem praebere suum esse dicenti. Advertens igitur quod mentem eorum subierat, intelligens animis eorum retentam reprobationem, metuit, ne vitium sibi adspargeretur, et repetivit verba Corani, „nonnulla suspicio est peccatum,“ tum dixit: o carminum traditores, sermonis aegroti medici! substantiae sinceritas exploratur fundendo, veritatis manus findit vestem dubitationis, et jam antiquis temporibus dictum est, probatione vir honoratur aut contemptui fit; et ecce! offero seriam meam, ut examinetur, porrigo peram, ut specimen inde promatis. Protinus ibi praesentium unus dixit: versum habeo, cujus non texi solet liciatorio, cujusque nulla vena edidit similem; si itaque vis delinire corda, versum pange hoc modo! et declamavit:

E narcissis pluit margaritas, rigantes rosas, et mordet zizypha *) grandine.

Non autem oculi nictu diutior, imo brevior, interposita erat mora, cum declamaret hoc rarum:

Visitantem rogavi, ut detraheret ricam rubram, auribusque meis optimum deponeret nuntium.

*) Baccae scil. zizyphi fert rubras.

Removit itaque crepusculum tegens lunae splendorem, et sparsit margaritas e sigillo odoro.

Hanc ob extemporalem facundiam stupentes, qui aderant, innocentiam ejus agnoverunt. At cum se videret illorum sermone suo benevolentiam consecutum esse, ita ut jam effuso cursu aggrederentur ipsum honorandi viam, momentum oculos demisit, tum dixit: tenete duos alios versus! et declamavit:

Accedens die discessus serio destinati, vestibis atris, mordebat digitos ut poenitens, desperata.

Nox lacebat super aurora, utramque sustinebat virga, beryllos masticabat margaritis,

Ibi homines grande ei statuerunt pretium, largam praedictarunt ejus pluviam, beneque conversantes pulchrum fecerunt ejus corticem. Dixit, qui hanc historiam retulit. Cum autem viderem flammam carbonis, coruscationem splendoris, longius provectus sum in ejus considerata physiognomia, oculum libere pasci sivi in ejus characteribus, et ecce! senex erat Sarugensis, cujus tenebrosa nox ¹⁹⁾ jam lunae sparsa erat lumine. Itaque mihi gratulatus adaquationem ejus, festinavi ad osculandam manum, et dixi: quid mutavit habitum tuum, ut te non cognoscerem, qua re tua incauit barba? Ibi orsus est.

Turbantes adversitates canum me fecerunt. Nam fortuna homines versat; Cuicumque die quodam obsecuta est, crastino durum in eum dominium exercet.

Ne confidas igitur fulguris ejus splendori, utpote decipienti!

At si eadem adversitates contra te incitaverit et congregaverit, tolera!

Auro enim non est dedecori versari in igne.

Posthaec surrexit, relinquens locum suum, secum asportans corda.

¹⁹⁾ Nigra coma.

C a i l a n u s .

Retulit Haret Hammamita. Continebat me et amicos quosdam consessus, quo nullus frustrabatur vocans, nec fallebat igniarii percussio, nec flagrabat ignis rixae. Dum autem certatim trahebamus lacinias declamationum, oblectabamur venustis traditionibus, en! stetit prope nos persona, trita veste induta, incessu claudicans, et dixit: O electissima thesaurorum, gaudia familiarium! conducatur vobis oriens dies, laeto fruamini jentaculo, et adspectu dignemini virum, cui olim erant convivia et liberalitas, bona et dona, agri et pagi, patinae et hospiti (praeparati) cibi; sed, non cessantibus tristibus negotiis, bellis aerumnarum, scintillis malae invidiae, vicissitudinibus atris, carere tandem incepit vola, calva evasit area, subsedit scaturigo, non convenit mansio, diffluit conventus, duritie laesit accubitus, mutavit se status, ejulavit familia, vacaverunt stabula, miseruit aemulans, periit loquens et silens, flevit invidus et convitiatus; eoque adacti sumus fortuna in aerumnam conjiciente, paupertate ad pulverem deprimente, ut calceus esset dolor, cibus angor, intus haberemus incendium, intestina complicaremus fame, oculos tingeremus insomnia, valles eligeremus habitacula, molles reputaremus spinas, oblivisceremur sellarum camelinarum, laudaremus mortem delecturam, tardum censeremus diem natalem! Estne ergo in vobis ingenuus medens, liberalis consolans? Nam, per eum, qui me produxit gente Caila! frater evasi egestatis, non habeo, quo me sustentem unam noctem. Dixit Haret Hammamita. Condolui ob ejus miseriae, sed, cupidus eliciendorum ejus rhythmorum, ostendi ei aureum et dixi exploraturus: hunc si laudas versibus, tibi est certus. Quibus auditis occoeperit declamare, nec tardans, nec aliena sibi arrogans:

Laudetur ¹⁾ aureus, cujus splendet flavedo, mundi plagas secatur cursus, longissima sunt itinera,

¹⁾ Falso vertitur: laudo.

Percrebruit fama et gloria, lineamenta commissum sibi servant arcantum pluti;
Cujus superbo incessui se adjungit conatuum successus, omnibusque mortalibus
amatus est candor,

Quasi liquatis cordibus esset ortus; quem qui crumena continet, animosus est,
Etiamsi tardent aut perierint liberi! Euge venustatem ejus et splendorem,
Et euge comoda ejus et auxilium! Quot viri nonnisi ejus ope negotia sua
ad finem perducta viderunt;

Quot beati sine eo mansissent in miseria; quot aerumnarum exercitus dispulit
ejus impetus;

Quot lunae plenae ad descensum adductae sunt ejus copiis; quot iratis, quorum
arderet carbo,

Ejus audito clandestino alloquio sedata est vehementia; quot captivis, quos pro-
diderat cognatio,

Hic liberavit, ut clarum eis esset gaudium; quot domini jura ejus produxit
creatio!

Ni obstaret religio, dicerem: summa ei est potestas!

His declamatis porrexit manum dicens: vir ingenuus perficit, quod promisit,
uti nubes effundit, postquam intonuit. Aureum ergo ei projecit et addidi: sume
eum, non contristatus. Ille, ori eum indens, inquit: benedictus sit a Deo! tum,
gratiis actis, se accinxit ad abeundum. Mihi vero facetiis ejus suborta desiderii
ebrietate, tam leve videbatur contrahendi aeris alieni facere initium, ut, extracto
aureo altero, dicerem: visne hunc vituperare, dein tibi habere? Et declamavit,
altiore et canora voce, festinans:

Pereat deceptor, infidelis, flavus, praeditus, ut simulator, duabus faciebus,
Duabusque conspicienti apparens formis, ornamenti amatorum et coloris *)
amantium,

Ipsius amore seducens judicii praepositos ad comparandam Domini iram;
Qui si non esset, non abscinderetur dextra furis, non videretur injuria tyranni,
Non abhorreret avarus a nocturno visitatore, nec quereretur dilatus dilationem
tardantis;

Nec Dei auxilium imploraretur contra osorem sagittis petentem, nec rebellaret
creatus creatori;

*) Qui est flavus.

Cujus malis ex moribus hoc quoque est, quod opem non fert in angustiis,
Nisi fugerit, ut fugit deserens servus! Bene illi, qui de fastigio eum dejecerit,
Et amici modo insusurranti responderit sermone veracis, probi: displicet tua
conjunctio, discede!

Dixit relator. Excepi: quam copiosus tuus est imber! Resumsit: promisso
vero inest, quod magis cogat. Afflavi ³⁾ eum itaque aureo altero, adjiciens: serva
eos primae Suratae amuleto ⁴⁾. Ille vero, aureo in os inserto et ad geminum
addito, discessit laudans matutinum excursum, extollens donantem et donum.
Dixit Haret Hammamita. Cor mihi meum clanculum innuit, eum esse Abu
Seidum, clauditem autem dolum, rogavi eum itaque ut reverteretur, et allocu-
tus sum: ornata tua oratione jam proditus, incessu utere recto! Respondit:
si tu es Hammamita, honorificentissimam tibi salutem dico, optans, ut diu vivas
inter liberales. Resumsi: ego sum Haret; qualis vero tuus novissimis his tem-
poribus status ⁵⁾? Respondit: duplice vivo statu, miseriae et commoditatis; duo-
busque versor cum ventis, vehemente et leni. Perrexī: qui vero potuisti te si-
mulare claudum? tui similis (senex) joculari non solet. Ibi abscondente sese, quae
modo revelata apparuerat, hilaritate, tergum vertit declamans:

Clauditem simulavi, claudicandi non cupidus, sed ut pulsarem portam laetitiae;
Dein, freno cameli tergo immisso, viā tenderem, qua tendit libere exspatiens ⁶⁾,
Reprehendentibusque respondere possem: excusato, claudo non est verten-
dum vitio!

³⁾ Saepius occurrit pro: domare. ⁴⁾ Interpretantur haec: gentias age Deo! quia primum Cerani caput
incipit verbis: laus sit Deo! Sed magis arridet: tanquam sanctissimo amuleto hoc aurum tibi servetur, ut
possessione ejus diutissime gaudas! ⁵⁾ Non bene Schultensius vertit: quis status, quae fortunae? Proprie
enim transferendum esset: quis tibi status et fortunae cusus? Et autem hic notat eum, ita ut cusus sit:
quomodo tu te habes cum fortunae casibus? ⁶⁾ Nimis libere Schultensius: qui nutant in religione.

D a m i a t e n s i s.

Commemoravit Haret Hammamita. Profectus sum Damiatam anno, quo ultro citroque pellebamur ¹⁾. Spectabar autem tum temporis statu commodo, amabar a fratribus, tractabam vestes limbatae opulentiae, revelatam conspiciebam faciem laetitiae ²⁾, et habebam socios, qui confregerant baculum dissidii, sugebantque concordiae plenum uber, ita ut aequalitate splenderent instar pectinis dentium, voluntatum conspiratione una viderentur esse anima. Nihilominus proficiscebamur, quasi salus posceret, celerrimis tantum vehebamur jumentis, et descendentes in mansione, aut aquam haurientes e rivo, moram corripiebamus, cunctationem evitabamus. Nocte quadam juvenilis comae praedita nigrore, corvi densis involuta plumis, iter forte continuabamus, donec tenebrae exuerant juventutem, et aurora earum absterserat tincturam, ubi fastidientes pergere, desiderantes dormire, inventa regione, cujus graminosi erant colles, lenibus afflati euris, hanc eligebamus cubitum camelis, stationem diluculo paullum quieturis. Cum autem turba miscella descendisset, camelorumque gemitus ac hominum murmur obmutuisset, audivi vocem virorum; (scilicet) dicentis: qui tibi mos est vivendi cum aequalibus tuis et vicinis? et respondentis: Amice tracto vicinum, etiamsi injuste agat; mihi illum quoque conjungere studeo, qui insultet; tolero consortem, utut turbet; diligo propinquum, vel si potum fervidum ³⁾ infundat; amicum praefero fratri germano; socio pacta servo, quamquam decimam non rependat partem; largissimum hospiti datum leve existimo; ejusdem mecum cameli equitem beneficiis demergo; confabulatorem nocturnum habeo loco Amiri; familiarem colo ut principem; noto trado quaecunque donare habeo; comitem bonorum meorum

¹⁾ Proprie, impulsione et repulsione. ²⁾ Ut sponsam. ³⁾ Gehennae.

statuo arbitrum; leni oratione alloquor osorem; persevero interrogare de eo, qui me negligit; vice soluti promissi contentus sum ramento; pro remuneratione minutissimam acceptam habeo particulam; non laedo, quando laedor, nec ulciscor, etiamsi momorderit variegatus serpens. Ad quae socius regressit: Vae ⁴⁾ tibi mi fili! reconditur recondendum, et inhiatur pretioso; sed non accedo ad illum, qui non vicissim accedat; non signo observantia mea fastidiosum; non puram exhibeo amicitiam neganti aequitatem; non fratrem voco viacula negligentem; non adjuvo fallentem spes meas; non curo solventem connexum; non blandior ignoranti meum pretium; non trado habenam meam illi, qui foedus rumpit; non largior amicitiam adversariis; non vanum esse sino, quod comminabar hostibus; non planto dona terrâ inimicorum; non solatio exhilario gaudentem de infortunio meo; non illius misereo, qui gaudet de interitu meo; non dono muneribus meis selectis, praeterquam dilectos; non medicinam rogo alios, quam amatos; non intimam amicitiam dedico alii, quam sarcienti meam rupturam; non sincerus sum illi, qui meam vult mortem; non vota pro illo facio vera, qui non implet peram meam; non effundo illi gratias meas, qui evacuavit vasa mea. Et quis unquam rectum iudicavit, ut ego donem, tu retineas; ego mollem me praestem, tu asperes agas; ego liqueam, tu congeles; ego ardeam, tu exstinguas? Nemo, per Deum! Verbum itaque verbo pendamus, ut penditur aurum; facta acquemus, ut soleae aequantur calceorum; ut securi simus a fraude, defendamus odium! Si non — cur ego te lactem, tu me afflictes; ego te juvem, tu me despicias; ego pro te acquiram, tu me vulneres; ego ad te veniam, tu me ire sinas? Quomodo aequitas emi potest injuria; qui sol radiare cum nubibus; quando amor socius esse violentiae; et quis ingenuus contentus fuit conditione depressionis? Divina sane sunt patris tui verba:

Qui amorem mihi praestat constantem, praemium ei do illius, qui super fundamento suo exstruit;

Admetior amico, ut mensus est mihi; sive modium plenum dederit, sive diminutum;

⁴⁾ Vac, dicunt scholia, tantum esse exclamationem mirantis. Hoc non est verum; atque esse exclamationem comminantis, condolentiaeque, sequentes narrationes ostendunt.

Nec eum frustra; nam pessimus est mortalium, cujus hodiernus dies non respondet hesterno ⁵⁾);

Et quicumque apud me petit fructum, non aliud decerpit, quam quod plantavit; Non animus est decipere, neque vero abire, ut cujus manus complosione deceptus est sensus;

Nec mihi impono officium erga eum, qui sibi non imponit officium erga me. Saepe quidem, qui impurum foveret amorem, credidit, me sincerum ejus esse amicum, quamvis simularet;

Sed non intellexit prae ignorantia, me creditori meo debitum solvere eadem moneta.

Et fuge eum, qui te stultum aestimat, fugam odii, eumque cense ut sepulcro conditum;

Ac simulatione miscenti conjunctionem, monstra te veste ejus, a cujus familiaritate abhorretur ⁶⁾);

Nunquam autem amorem spera ab eo, qui te putet pecunia egere sua ⁷⁾)!

Dixit Haret Hammamita. Audito autem mutuo amorum sermone, desideravi spectare ipsorum personas; cum itaque appareret filius ardoris, et coelum involveret luce, surrexi, antequam surgerent iuineris socii, et non ⁸⁾ ut mane prodit corvus, incepique versus vocem illam nocturnam tendere, stricta oculi acie observans facies, donec conspexi Abu Seidum et filium ejus conversantes, indutos vestibus grossioribus laceris. Quos animadvertens mihi fuisse collocutores noctis, auctores institutionis, adii, amans eorum lenitatem, dolens egestatem, et invitavi ⁹⁾, ut ad meam se conferrent stationem ¹⁰⁾, meaeque domini essent copiae et inopiae. Atque incepi virtutem eorum divulgare inter viatores, ac arbores eis concutere fructiferas, ita ut mergerentur muneribus et haberentur amici. Eramus autem mansione, unde distincte notari poterant adificia pagorum, clareque spectabamus ignes hospitalitatis. Cum itaque Abu Seid marsupium suum videret

⁵⁾ Schult. vertit: cujus dies damnum fecerit prae matre sua. Legit Otom pro Ama. ⁶⁾ Schult. certe variante lectione ductus: induae vestem abhorrentis a familiaritate ejus. ⁷⁾ Manifesto contenduntur praecepta religionis christianae cum veterum Arabum placitis, qui nimis inclinabant ad talionem. Cfr. Ibn Dorcidi Idyllium V. 126, 132, 133. ⁸⁾ Non ut, phrasis dicitur esse non mere Arabica, sed Irakensium. Non raro Hariris ea utitur, significatque, magis, vel plus, quam. ⁹⁾ Proprie, persuasi cie. ¹⁰⁾ Perperam: ad meam cellam.

impletum, miseriam fugatam, dixit mihi: corpus meum est sordidum, squalor firmus; permittisne mihi, ut pagum accedam, me lavatum, hancque curam dispulsum? Respondi: si hoc vis, festinatio, festinatio, et reditus, reditus! Reposuit: invenies me citius revertentem, quam oculus a prospectu revertatur tuus. Tum effuso cursu abiit, ut celer equus in hippodromo, filio dicens: festina, festina! Nos autem, non putantes, eum decipere et fugere, morabamur eum expectantes, ut expectantur festorum novae lunae, donec prope aberat, ut diei senescentis crepido *) corrueret. Cum itaque meta expectationis nimis esset longinqua, et sol luceret (nebularum vespertinarum) laceris pannis, dixi sociis: modum excessimus morando; distulimus profectionem, usque dum amisimus tempus; jam autem clarum est, virum mentitum esse; paramini igitur ad iter faciendum, nec cujusquam fime ti oculos vestros in se convertito viriditas *)! Ipse vero surgens, ut piletio instruerem camelum, et sarcinas imponerem profectionis causa, Abu Seidum inveni sellae inscripsisse:

O tu, qui mihi brachium fuisti et auxilium prae omnibus mortalibus!
Ne existimes, me aufugisse fastidio aut nimia satietate;
Semper ego ex iis eram, qui cibati dilabuntur!

Addidit (Haret). Coetum, ut sellae inscriptionem legerent, admonui, quo, quem vituperaverant, eum excusarent. Hi vero, lepidum sermonem admirantes, Deum implorabant averruncum ab illius noxa. Tum perreximus, nescii, quos jam ille nostrum loco elegerit alios.

*) Dies flumini comparatur. *) Non multi pretii habentur gramina in profectionum aconitarum relictis simetia nascentia; hinc simeti viriditate proverbialiter designatur species boni, cui non subest verum commodum. Occurrit hoc proverbium etiam cons. XVIII; vide Decadem p. 6, lin. 4. A Muhammede ortum fertur, qui cum aliquando dixisset, „cave te vobis a simetorum viriditate,“ interrogatus, quid ista phraei intenderet, responderit: puellam pulchram haud laudabilis plantarii, i. e. originis.

C u f i c u s.

Commemoravit Haret Hammamita. Cufae confabulatus sum nocte, cujus facies erat bicolor, cujusque luna referebat amuletum argenteum, cum sociis nutritis lacte eloquentiae, oblivionis syrma trahentibus super Sachbano ¹⁾. Nemo eorum erat, a quo disci non potuisset, aut a quo sibi cavere necesse fuisset; ad unumquémque inclinabatur, a nullo abhorrebatur. Et fascinavit nos confabulatio, donec occiderat luna et dominata est vigilia. Cum autem velum expandisset sinceri nigroris nox, et nihil restaret quam dormiturgentis nutatio, audivimus a porta sonum latratum cientis, quem sequebatur pulsatio petentis, ut aperiretur. Diximus ergo: quis nos accedit nocte atra? Respondit:

O homines hujus recessus, a malo sitis liberi, nec obviam habeatis, quoad vi-
vetis, noxam!

Nox densa ad septum vestrum pepulit virum capilli disjecti, pulverulentum,
Fratrem itinerum diurnorum, longinquorum, donec evasis curvus, pauper,
Similis novae coeli lunae, cum primum splendet. Quin arcem vestram oppres-
sit indigus pudens,

Prae omnibus aliis mortalibus vos adiens, ut quaereret hospitium et quietem.
Hospitem igitur accipite contentum, ingenuum, qui acquiescit dulci et amaro,
Certeque a vobis discedet, benignitatis vestrae laudem spargens!

Dixit Haret Hammamita. Cum autem sermonis dulcedine nos fascinasset, et cognossemus, quid esset pone fulgur ejus, festinavimus aperire portam, ei obviam ivimus salutatione ²⁾, et diximus puero: heus, heus, affer quod est paratum! Dixit hospes: per eum, qui me constituit in septo vestro! non adlambam

¹⁾ Dicitur hunc veterum Arabum oratorem, cum duas conciliare vellet gentes, per dimidium diem locutum esse, nec unum repetitae verbum. ²⁾ Scil. dicendo: ample et commodo fruaris loco!

cibum vestrum, nisi sponderitis, vos me non habituros molestiam, nec mei causa vobis imposituros esum. Saepe enim esus cruditate afficit edentem, et convivius ei interdicit; pessimus autem est hospes, qui imponit gravia, excipientique affert noxam, praesertim noxam corpori adhaerentem, in morbos adducentem; nec dicit proverbium pervagatoris instar pervagans, „optimae coenae sunt lucentes ³⁾“, alia mente, quam ut mature coenantes abstineamus a nocturnis epulis, quae reddunt luscitiosos; nisi quando, o summe Deus! ardet esuries et prohibet a somno. Dixit; et quasi nostram voluntatem perspexisset, aut ab arcu fidei nostrae jecisset, absque dubio ineundo pacto ei gratificati sumus, et gratias egimus ob aequabiles mores. Cum autem puer adtulisset, quod in promptu erat, et inter nos accendisset lampadem, considerabam illum, et ecce! erat Abu Seid. Quare socii dixi: proficiat vobis, qui advenit, hospes, vel potius frigida praeda! Nam, quamquam occidit luna (lucens) domo Sirii, orta est luna poeticae, et quamquam occidit plena luna Natrae ⁴⁾, jam splendet plena luna prosae. Et invasit eos ardor laetitiae, avolavit somnus ab oculorum hircis, rejicientesque quietem, ad quam tetenderant, reversi sunt ad explicandam festivitatem, quam complicitant. Abu Seidus quidem intentus erat manuum suarum labori, donec, facto mensam tollendi initio, diximus: delecta nos enarratione cuiuspiam e confabulationibus tuis egregius, aut itineribus tuis mirandis! Respondit: expertus sum mira, quae nemo vidit videntium, nec ullus tradidit tradentium; ad maxime autem mira pertinet, quod spectavi hac nocte, antequam accessi ad vos, et ad vestram tendi portam. Petivimus itaque, ut referret, quod novum vidisset, libro vagans gradu, et dixit: Peregrinationis arcus me expuerunt in hanc regionem, famelicum, miserum, gestatorem perae vacuae, ut cor matris Mosis ⁵⁾. Surrexi itaque per silentium tenebrarum, quamquam pedes dolebant, ut quaerirem virum excipientem, aut acquirerem orbiculum panis, et pepulit me agaso famis, et fatum, cui cognomen est pater miri, donec constitui ad portam domus et dixi:

³⁾ I. e. dinnae. ⁴⁾ E mansionibus est lannae; duae scilicet stellae sphingae intervallo separatae, inter quas ut nebula apparet naus leonis. Notat vero etiam prosam, sive orationem epuram, non viciatam. ⁵⁾ Quod spe vacuum erat.

Per sanctitatem senis ¹⁾, qui sanxit hospitalitatem, et peregrinationis scopum
fundavit in matre urbium!

Nocturno visitatori, si talis supervenit, nihil apud nos est, quam sermo et cubi-
tius in septo.

Quomodo alios hospitio excipere potest ille, cujus somnus fugatur fame, et
ossa nudantur ejus impetu!

Quid tibi videtur de his, quae retuli, quid videtur?

Excepi: quid agam mansione vacua, statione socii paupertatis? Sed, o ju-
venis, quod tibi est nomen? jam enim intellectus tuus in admirationem me
duxit. Respondit: nomen mihi est Seid, et patria Feid; heri hanc in regionem
veni cum avunculis ex Absitis. Dixi: auge me luce, tu, qui vivas et extollaris!
Dixit: narravit mihi mater mea Barra, quae, ut nomen edicit, est pia, se anno
invasionis nupsisse viro e Sarngi et Rhassani primariis; hunc vero, cum ejus
animadvertisset gravitatem, quod esset astutus, prouti ferant, secreto eam dese-
ruisse, et ad hoc usque tempus nesciri, vivatne, ut expectetur, an mandatus sit
sepulchro deserto. Perrexit Abu Seid: signis autem fidis cognovi eum filium
meum esse; manus tantum vacuitas me prohibuit, quin me ei notum facerem;
ob hanc ab eo discessi jecore contuso, lacrimarum torrente effuso; et num un-
quam, o prudentes, audivistis, quod hoc miro magis esset mirandum? Respon-
dimus: minime, per eum, cui est (clarissima) scientia libri ²⁾! Perrexit: redigite
eam in ordinem singularium eventuum, memoriamque ejus sempiternam tradite
foliis ³⁾! nunquam enim historia similis vagata est mundi plagis. Allato itaque
atramentario et nigris ejus serpentibus ⁴⁾, historiam signavimus, uti contexerat;
dein vero elicere tentavimus sententiam ejus de recipiendo puero. Ibi dixit: si
modo gravis esset manica, leve mihi esset educare filium. Resumsimus: si vi-
ginti aureorum tibi sufficit summa, statim tibi eam colligemus. Dixit: qui non
acquiescerem tantae summae, quam nemo contemnere potest, nisi fatuus! Conti-
nuavit relator. Nostrum ergo quisque ei commodavit partem, datoque se obli-
gavit libello. Pro hoc beneficio gratias egit, largam laudi impendens orationis
copiam, donec, cum jam nimis longa nobis videretur celebratio, nimis exiguum

¹⁾ Abrahami. ²⁾ Corani. ³⁾ Proprie, foliorum ventribus. ⁴⁾ I. e. calamis. Perperam Schult. et reliquae
instrumento.

minnus, fabularum protulit ornatarum, quod contemtas faceret vestes variegatas Iamanicas, usque dum appropinquavit diluculum, aurora. perripuit illustrans, et confabulando transegeramus noctem, ex quo omnis ejus occiderat lucida stria, usque dum canescebant ejus antiae, et cujus perfecta erat felicitas, donec florescebat ejus arbor ¹⁰⁾. Cum autem primum conspiceretur cornu gasalae ¹¹⁾, exsilivit in morem gasalae, et dixit: surge mecum, ut accipiamus dona, et stillatim promanare faciamus in me translatas summas; nam jam volitant jecoris mei laciniae ¹²⁾ filii mei desiderio. Alae itaque ejus me adjunxi, donec pulchrum ei feceram successum. At postquam numeratam pecuniam bursa sua condiderat et, fulgentibus frontis hilaris lineis, dixerat, „Deus rependat pedum tuorum gressus; Deum imploro tibi, mea vice, remuneratorem!“ affantem me, „volo te sequi, ut videam filium tuum generosum, eumque alloqui, ut respondeat,“ adspexit, ut deceptor adspicit deceptum, et ridens, ut in utroque oculo lacrimae reciprocarentur ¹³⁾, declamavit:

O tu, qui decipientem splendorem ¹⁴⁾ pro aqua habuisti, cum narrarem, quod narraui!

Non putavi, absconditum mansurum esse dolum meum, aut dubiam fore intentionem.

Per Deum! nec uxor mihi est Barra, nec filium habeo, cujus nomine appeller. Sed variae sunt mihi artes magicæ, quas novas inveni, nec aliunde duxi, Et quæ nec Azmaï ¹⁵⁾ retulit in relationibus suis, nec pertexuit Cumeit ¹⁶⁾; His utor medijs consequendi, quæ manus decerpit, quando desidero; Si vero supersederem, immutaretur status meus, non obtinerem, quod obtinui. Accipe igitur excusationem et condona, si peccatum commisi crimine! Hic valedixit et abiit, corde meo Gadhae ¹⁷⁾ depositis carbonibus.

¹⁰⁾ Schult. legit Amad pro Aud; inde verit, cum columna diluculi prorupisset. Sed dies oriens hic comparatur arbori, cujus rosei se explicant flores. ¹¹⁾ I. e. solis. ¹²⁾ Proprie, fusa. ¹³⁾ In usu est de sonis, in gutture se reciprocantibus. ¹⁴⁾ Sarab splendor est deserti, aquæ speciem præ se ferens, sed ludens sitientes. Cfr. Lebidi Amiratæ Kazidam Muallakam v. 15. ¹⁵⁾ Nomen integrum est Abu Saïd Abdolmelik bin Corcib bin Azem bin Abdolmelik bin Azma bin Muthhar bin Riach bin Omar bin Abdollah Bahellita. Plura vide in dissertatione de Muallaka Lebidi, p. 37; cfr. concessum Taurisensem. ¹⁶⁾ Tres vixerunt poetas Cumeit dicti: primus ante Islamum, alter ante et post Islamum stabilitum, id quod notat vox Muchdharim; tertius, Cumeit bin Seid, post Mohammedem, carmina omnium pepigit longissima, ut in proverbium abierat ¹⁷⁾ Arbor cujus lignum prunam vivacissimam præbet.

M a r a r h i e n s i s .

Commemoravit Haret Hamnamita. Versabar Mararhae in concilio regiminis ¹⁾, cum, mentione eloquentiae facta, omnes, qui aderant, ex equitibus calami et dominis praestantiae, consentirent, non superesse, qui enucleate componat ²⁾, et hac in arte versetur pro lubitu; nec restitisse post praecessores, qui inveniat viam candidam, tractatumve defloret virgineum; sed seculi hujus scriptores praestantissimos, facundiae frehorum potentes, mendicos esse respectu majorum, etiamsi possideant eloquentiam Sachbani Vajelitae. Erat autem in consessu vir, sedens in angulo, ubi famuli stare solent; et quotiescunque illi modum excedebant in curriculo, et meliores vilioresve spargebant e cophino suo dactylos, limus ejus prospectus elatusque nasus indicabat, eum terrae adhaerere, ut prosiliat; contractum jacere, ut orgyam extendat; jaculatorem esse, qui sagittas dolaverit; cubitorem, qui quaerat pugnam. Cum autem evacuatae essent pharetrae, rediisset tranquillitas, quiescerent procellae, abstinerent altercatores, cessarent strepitus, silerent increpatus et increpans, accessit ad multitudinem et dixit: o homines, rem fecistis stupendam et a scopo aberrastis vehementer, dum magnificistis ossa putrida, excessistis favendo praeteritis, et despexistis generationem, qua vestri sunt fratres, quaeque vobis juncta est amicitiis. Oblitine estis, o peritissimi nummorum exploratores, magorum antistites in solvendo et nodando, quod novae ediderunt venae, quove bimns equus ad certamen provocat quinquennem, parollarum castigatarum, metaphorarum dulcium, epistolarum balteatarum, rhythmorum venustorum? Et num prisci, si recte considerat nunc vivens, alias sententias protulerunt, quam e fontibus haustas, qui nunc quoque frequentantur ³⁾; quam

¹⁾ Secus Schult. habet eruditionis. ²⁾ Scil. orationes. ³⁾ Perperam Schult.: quam qui aquarum turbidis et calcatu veniant comparandi, e quibus nihil celsum ac venustum eluceat. Neutiquam orator veteres vult vituperare.

fugaces vinctas ⁴⁾), quae nunc quoque vinciuntur; ab illis per manus traditas ideo, quod prius nati erant, non ideo, quod abigens a rivo ⁵⁾) accedentem superat? Mihi quidem notus est, qui quando scribit, pingit; quando exponit, vestem texit Iamanicam; quando compendiose loquitur, miracula edit; quando latius evagatur, deaurat; quando nova producit, corda findit; quando ex tempore loquitur, attonitos facit. Excepit concilii ἐπιστολῆς, primatum illorum oculus: quis hunc saxum tundit ⁶⁾) et harum proprietatum est admissarius ⁷⁾)? Respondit: hippodromi tui socius, pugna tibi adversarius, et, si vis, exerce generosum ⁸⁾), voca responsurum! videbis, quod miraberis. Resumsit ille: o quisquis es! milvus nostra regione non sit aquila, et facile nobis est distinguere argentum a glarea; raro autem, qui se exponit certamini scopum, evadit morbo incurabili; raro, qui pulverem ciet probationis, effugit contentus festucas. Ergo tu, honorem tuum ne prostitue ignominia afficienti, nec averte te a consilio bene consulentis! Regessit: quisque suae sagittae optime novit signum, et nox suam prodet auroram. Hominibus ibi clam deliberantibus, qua re puteum ejus explorarent, virique agerent experimentum, unus inquit: meae eum cedit parti, ut eum petam historiae meae silice, quae nodus est intricatus, nummorum lapis lydius. Ornarunt eum itaque dominio, ut rebelles quondam Abu ⁹⁾) Naâmam; et accedens ad virum illum inquit: scias velim, me cognatum esse hujus regionis praefecto, statui meo providisse dulci eloquentia, et ad reparanda curvata sufficiens habuisse auxilium domi, in facultatum copia et alendorum paucitate. Sed cum tergum meum aggravatum esset et periisset pluvia, ad illum contendi ex oris meis rogans et orans, ut mihi restitueret nitorem et irrigationem; et laetus erat ob adventum meum ac lubens, et mane me bonis cumulavit vespereque. Petenti vero tandem mihi licentiam, domum revertendi tergo laetitiae, dixit: ego mihi proposui, tibi non dare viaticum, nec concedere, ut relictis tuis te adjungas, nisi ante discessum tuum componas epistolam, qua statum tuum ita explices, ut vocabulorum binorum prioris litterae omnes sint punctatae, litterae posterioris

⁴⁾ Sententiae, quae ob pulchritudinem mox in omnium ore sunt, comparant cum celerissimis gamliis. ⁵⁾ I. e. a vita discedens; allegoria e vita pastoritia decumta. ⁶⁾ I. e. quis est detrectator? ⁷⁾ Dominus, possessor. ⁸⁾ Scil. hanc. ⁹⁾ Abu Naâma cognomen est Cathrensis, oratoris et poetae, tempore Mus'abi, filii Subeiri,

distinctae sint puncto prorsus nullo ¹⁰⁾. His auditis totum annum expectavi facundiam meam, sed non edidit verbum; totum annum mentem excitavi, sed aucta est sopore; omnes ¹¹⁾ doctos auxilio vocavi, sed quisque caperata fronte se avertit. Si ergo vera de te retulisti, fac veracitatis tuae proferas testimonium! Respondit: ad cursum incitasti equum cursorem, rigationem postulasti fusorem, arcum transmisisti in fabricatorem, domum habitare jussisti exstructorem! Tum, postquam cogitaverat, donec plenam existimabat venam, abundans lac camelae, dixit: erioxylon ¹²⁾ inde atramentario, sume calamum et scribe: Liberalitas, o tu, cujus felicitatis exercitum Deus confirmet! ornat; avaritia, o tu, cujus inimicorum oculos fortuna deprimat! dedecorat; nobilis remunerat, ignavus frustrat; hospitalis excipit, sterilis terret; benignus nutrit, rixosus laedit; donum salvat, retardatio angit; preces custodiunt, laus purificat; ingenuus praemia obtinet, denegans ignominia afficitur; projicere verendos est error, frustrare filios spei est crudelitas; nemo avarus est, nisi imbecillis mente; nemo decipitur, nisi tenax; nemo pecuniam condit, nisi miserabilis; nec contrahit manum pius. Nunquam desinant promissa tua impleri, consilia tua sanare, luna tua splendere, clementia tua agnoscere, dona tua ditare, inimici tui te celebrare, potestas tua aedificari, gladius tuus perdere, petentes a te decerpere, te laudans colligere, coelum tuum pluere, liberalitas tua juvare, copia tua redundare, repulsa tua deficere! Qui spem suam in te posuit, senex est similis umbrae, cui nihil restitit; adiit te mente acerrimae aviditatis; laudavit te selectis ¹³⁾, quae dote donare necesse est; desiderium ejus autem facile expletur; quae animum ei tuum propensum reddant, sunt manifesta. Laus ejus pro praeda habetur, vituperium timetur; pone se habet familiam numerosam, sagittis adversitatis petitam, injustitia expilatam, emaciatam, nemine excepto; dum ipse versatur in lacrimis sibi respondentibus, tristitia liquefaciente, cura inhaerente, moerore excedente; quod spes frustrata est, neglectus canitie sparsit, inimicus dentes collisit, tranquillitas evannit; neque vero declinavit amor,

quem rebelles Chalifam salutarunt viginti per annos. ¹⁰⁾ In lingua latina sola littera l puncto insignitur; in hac ergo artificium illud, quo prima quaeque vox litteris punctualis constat, altera quaeque non punctatis, locum habere non potest. Similia occurrunt in consensu Alhvasensi et Sainarrandensi. ¹¹⁾ Reprehenditur hic Haririus a popularium aeorum nonnullis ob vocem Kathaba, omnes notantem, quippe quae ex usu non sit licitum ponere stato constructo. ¹²⁾ Qui calamus arbut, ille gossypium atramentario indere solet. ¹³⁾ Selectae orationes vel versus sponsa hic comparantur, quae dote necesse sit.

ut iram provocaverit; nec malos fructus tulit arbor ejus, ut resecetur; nec exspuit ¹⁴⁾ pectus (cogentia), ut excutiat; nec nodosum erat vinculum ¹⁵⁾, ut odio habeatur. Liberalitas ergo tua postulat, ut dignitatem ejus non projicias; sed spem ejus fac candidam ¹⁶⁾, auferendo dolorem! Divulgabit laudem tuam in mundo, o tu, qui vivas, ad removendam tristitiam, erogandes opes, sanandam aegritudinem, tuendos senes, societate copiae et laetitiae nitentis, quamdiu visitabitur domicilium divitis et timebitur intentio malevoli! Salve! Cum autem epistolam dictando ad finem pervenisset, et in praelio eloquentiae fortitudinem suam demonstrasset, multitudo ei gratificata est voce et facto, largum ostendens favorem et liberalitatem. Interrogatus vero, qua in gente ejus sit origo, qua in valle ejus nidus, respondit:

Rhasan nobilis mea est gens, Sargum patria mea pristina.
 Domus quidem illa solem aequat splendore et loco excelso;
 Mansio dicta paradisum, salubritate, amoenitate et pretio.
 Euge vitam, quam in ea transegi, et gaudia perfecta,
 Diebus, quibus limbatam tractabam vestem in ejus hortis, litans genio,
 Juventutis stola superbiens, revelatas conspiciens delicias pulchras,
 Non metuens fortunae vicissitudines, nec casus ejus vituperandos!
 Si homo moerore perderetur, ego mortuus essem moerore constante;
 Si redimi posset vita praeterita, ego eam redimerem pretioso cordis sanguine.
 Mori antiquius est viro, quam vivere vitam bestiae;
 Quam annulo contemptus duci ad magnas ¹⁷⁾ et injurias,
 Et leones videre discerpi unguibus injuriis inporum.
 Peccatum autem imputandum est temporibus; nisi ipsius esset mala indoles, non ingratus foret habitus;
 Ipsum si esset constans, status etiam in eo forent constantes.

Post haec perlata ejus historia ad praefectum, iste os ejus margaritis implevit, eumque adegit, ut ad ipsum se reciperet, quo praeesset scribarum concilio; at quamquam ad satietatem usque donatus erat, ab isto principatu eum retinuit

¹⁴⁾ I. e. non pronuntiavit. ¹⁵⁾ Nihil molesti erat in meae tecum conjunctione. ¹⁶⁾ Imple. ¹⁷⁾ Subintellige: calamitates. Non convenire mihi videtur quod Scholiastae suppleant: dignitates.

fastidium. Dixit, qui retulit. Equidem cognoveram lignum arboris ejus, antequam maturuerant ejus dactyli; et prope aberam, ut ejus pretium indicarem, antequam fulserat plena ejus luna; sed palpebrae nictu innuit, ut ne extraherem gladium ejus e vagina. Iam, cum exisset plena cum pera, discessisset potius victoria, eum secutus sum, amicitiae officium exsecuturus, reprehensurus scilicet eum ob recusatum praesidis munus; verum se avertit ridens et declamavit modulans:

Vagari per regiones cum paupertate, antiquius mihi est, quam magna dignitas.

Nam praefectis est asperitas et objurgatio, eheu quanta objurgatio!

Et nemo eorum bene facta complet, et firmat, quod constituit.

Nec te decipiat fallens deserti splendor, nec aggrediaris rem non perspectam;

Quot enim somniantes, laetati somnio, terrore percussi sunt expergiscentes! —

H a m a d a n e n s i s *Consessuum Specimen*¹⁾.

S i m i a r u m d u c t o r .

Retulit Isa filius Haschâmi ²⁾. Cum ego essem urbe Salami, reversus a peregrinatione ad domum sanctam, itineratorum more jactanter ambulabam in Tigridis ripis, ut contemplerer, quæ illic sunt amoena, lustrarem pulchra ornamenta. Tandem veni ad circulum virorum se urgentium, quorum colla torquebat videndi desiderium, risus findebat orum chalinos; et spectandi cupiditas eandem

¹⁾ Textum arabicum et versionem gallicam dat Sil. d. Sac. in Chrestomathie III, pag. 192. ²⁾ Similem historiolum exhibet J. de Hammer in libro: Encyclopädische Uebersicht der Wissenschaften des Orients I. p. 506. Ex quo prodit, Sasanitas non raro simiis uti ad hominum marsupia malgenda.

in me vim exercuit, donec loco steti, quo viri cujusdam audire poteram vocem, sed non conspiciere faciem, ob vehementem concursum et modum excedentem compressionem. Et ecce! simiarum erat ductor, qui simias ad saltandum incitabat suos, et adstantibus movebat risum. Ibi ego in modum canis collari ornati (venatici) insilui, et in hominum cervicibus incesi instar oblique gradientis, hujus quidem humero me projiciente in illius umbilicum, donec duorum virorum in barba, ceu pulvinari, insidens, post fatigationem gavisus sum quiete; quamquam cursu illo, tamquam compedibus impedito, excitata saliva me paene suffocabat, et loci angustia vix ferendam mihi imponebat molestiam. Cum autem simiarum ductor opus suum perfecisset, et spectatorum corona dispersa abiisset, coopertus sum veste desiderii, illius physiognomiam conspiciendi, et en! erat Abu'latach Alexandrinus; quem equidem increpui: quid istud vilitatis? Sed declamavit:

Vitium est temporis, non meum; vitupera singulares fortunae vias!

Stultitia consecutus sum, quod in votis erat, commodeque incedo vestibus
pulchritudinis.

Vat 1511 226

Emendanda.

In	Sex	Præf.	p.	lin.	17	pro	quis	lege	quominus.
-	Deride	-	9	-	1	-	sachari	-	sachari.
-	—	-	11	-	11	-	casu	-	casu.
-	—	-	14	-	2	-	improvisio	-	improvisio.
-	—	-	10	-	6	-	fratris	-	fratris.
-	Part. Max. Ind.	-	2	-	10	-	haecantium	-	haecantium.
-	Part. Max.	-	16	-	20	-	orationis	-	orationis.
-	-	-	20	-	3	-	hustion	-	hustion.
-	-	-	21	-	15	-	propinquis	-	propinquis.
-	-	-	—	-	16	-	etium	-	tium.
-	-	-	50	-	2	-	quam	-	quam.
-	-	-	—	-	18	-	decerpiat	-	decerpiat.
-	-	-	60	-	7	-	admiratio	-	admiratio.
-	-	-	62	-	2	-	homines	-	homines.
-	-	-	—	-	6	-	ascenderet	-	ascendit, etc. etc.
-	-	-	—	-	20	-	effudet	-	effundet.
-	-	-	72	-	37	-	montani	-	montano.
-	-	-	96	-	13	-	embryo	-	embryo.
-	-	-	99	-	17	-	dipulus	-	disipulus.
-	-	-	109	-	17	-	occurit	-	occurrit.
-	-	-	114	-	17	-	ego	-	eo.
-	-	-	127	-	25	-	culcent	-	calcent.
-	-	-	124	-	3	-	pinxerat	-	pinxerat.
-	-	-	131	-	10	-	quantumque	-	quantumque.
-	-	-	133	-	21	-	mens	-	men.
-	-	-	153	-	28	-	Alaem	-	Alaem.

Note. Lincula superimposita novellis vocabulis Part. Max. p. 127 est signum duplicationis. Pro fine Part. Max. p. 56 scribendum erat *fa n*, quod *menum* et *etibi* corrigendum est.

XXIII

2

33

Blank label

BIBLIOTHECA
Vittoria
X
5